



Republika e Kosovës
Republika Kosova - Republic of Kosovo
Qeveria - Vlada - Government

PROCESVERBAL

i takimit të dt. 18 dhjetor 2015 të

Këshillit Ministror për Reformën e Administratës Publike

Takimi i gjashtë i Këshillit Ministror për Reformën e Administratës Publike (KMRAP) u mbajt më 18 dhjetor 2015. Në takim, mori pjesë Kryeministri i Republikës së Kosovës, Isa Mustafa, ndërsa, takimi u zhvillua më tutje nën kryesimin e Ministrit të Administratës Publike, Mahir Yagcilar dhe pjesëmarrës ishin Ministri i Administrimit të Pushtetit Lokal, Ljubomir Maric, zëvendësministri i Financave, Agim Krasniqi, zëvendësministri i Tregtisë dhe Industrisë, Avni Kastrati, si dhe pjesëmarrës nga njësitë e përfshira në kuadër të fushëveprimit të KMRAP nga radhët e shërbimit civil.

Gjatë takimit, Kryeministri Mustafa, kërkoi adresimin sa më të shpejtë të të gjitha çështjeve që lidhen me reformën e administratës publike dhe që të përcaktohet afati kur do të përfundohen këto çështje para gjysmës së vitit të ardhshëm. Para anëtarëve të Këshillit, Kryeministri Mustafa rikonfirmoi zotimet për përmbushjen e obligimeve në procesin e reformës së administratës publike, që kanë të bëjnë me qeverisjen e mirë dhe me procesin e integritetit evropian, me qëllim të përmbushjes së parakushteve dhe obligimeve për të përfituar nga instrumenti i ri i përkrahjes buxhetore sektoriale, në kuadër të fondeve të para-anëtarësimit të dhëna nga BE-ja për Kosovën.

Ministri i Administratës Publike, Mahir Yagcilar, njëherësh kryesues i Këshillit Ministror të Reformës së Administratës Publike, prezantoi punën e deritanishme në përmblylljen e reformës në administratën publike, duke vënë theksin te kompletimi i kornizës strategjike dhe te nevoja për zbatimin e legjislacionit të miratuar. Ministria e Administratës Publike me këtë rast, ka bërë të gjitha përgatitjet e nevojshme teknike, dhe tani nevojitet të merren vendimet politike në Qeveri, duke përfshirë edhe alokimin e mjeteve të nevojshme buxhetore dhe planifikimin e tyre në Kornizën Afatmesme të Shpenzimeve, me qëllim të përmbushjes së parakushteve për përfitimin nga fondet e dhëna nëpërmjet përkrahjes buxhetore sektoriale, për dy shtyllat e para të reformës së administratës publike, i) zhvillimi dhe koordinimi i politikave dhe ii) shërbimi civil, ndërsa për shtyllën iii) menaxhimin e financave publike, pritet të kompletohet korniza

strategjike gjatë vitit 2016, dhe me atë rast, pas përmbushjes së parakushteve të negociuara me BE-në, Kosova do të përfitojë raundin e dytë të përkrahjes buxhetore sektoriale.

Pas fjalës hyrëse të Kryeministrit Mustafa dhe Ministrit Yagcilar, u prezantuan pikat sipas agjendës së miratuar dhe u bënë diskutime rreth vendimeve dhe afateve që duhet vendosur për secilën prej tyre. U prezantua në veçanti logjika e përcaktimit të treguesve të cilët janë vendosur për të matur progresin e reformës së administratës publike në kuadër të përkrahjes buxhetore sektoriale, metodologjia e unifikuar për monitorimin e kornizës strategjike për RAP dhe aspektet teknike për zbatimin e hapave të ardhshëm në kuadër të reformës së administratës publike. Pas diskutimeve të zhvilluara gjatë takimit, u arritën konkluzionet si në vijim:

KONKLUZIONET E DALA NGA TAKIMI I KËSHILLIT TË MINISTRAVE PËR REFORMË NË ADMINISTRATË PUBLIKE

1. Miratohen në parim treguesit e identifikuar për përkrahje buxhetore sektoriale, ndërsa Ministria e Administratës Publike dhe Ministria e Financave në koordinim me Ministrinë e Integrimit Evropian dhe Zyrën e Kryeministrit të përcjellin për miratim në Qeveri koston buxhetore për përmbushjen e treguesve për tri vitet e ardhshme. Kostoja të reflektohet edhe në KASH.
2. Kryesuesi i Këshillit të Ministrave për Reformën e Administratës Publike, z. Mahir Yagcilar sjell për miratim në Qeveri vendimin mbi themelimin e ekipit negociator për procesin e negocimit të treguesve për përkrahje buxhetore, në përbërje nga:
 - Ministria e Integrimit Evropian, Kryesues
 - Ministria e Administratës Publike;
 - Zyra e Kryeministrit;
 - Zyra e Planifikimit Strategjik, dhe
 - Ministria e Financave.Vendimi për themelimin e grupit negociator do të qartësoj përbërjen dhe përgjegjësitë e ekipit negociator. Afati për të sjell vendimin është java e dytë e janarit 2016.
3. Miratohet metodologjia e unifikuar për monitorimin dhe vlerësimin e zbatimit të kornizës strategjike për sektorin e reformës së administratës publike, që përfshin strategjinë për modernizimin e administratës publike, strategjinë për mirësimin e koordinimit të politikave, strategjinë për rregullim më të mirë dhe strategjinë për menaxhimin e financave publike.
4. Në fund të marsit, DMRAP, në bashkëpunim me ZKM, MF dhe në koordinim me MIE të hartojnë raportin monitorues për zbatimin e kornizës strategjike. Për strategjinë për modernizimin e administratës publike, për mirësimin e koordinimit të politikave, rregullim më të mirë, si dhe për strategjinë e kontrollit të brendshëm të financave publike. Për monitorimin e zbatimit të Kornizës

Strategjike për Reformën e Administratës Publike, themelohet Grupi Monitorues në këtë përbërje:

- Ministria e Administratës Publike;
- Zyra e Kryeministrit;
- Ministria e Financave;
- Ministria e Integrimit Evropian; dhe
- Ministria e Administrimit të Pushtetit Lokal.

5. Ministria e Administratës Publike, më së largu deri më 15 prill 2016, të përmbyll klasifikimin e vendeve të punës sipas njësive organizative, në përputhje me legjislacionin në fuqi. Paraprakisht MAP dhe ZKM të përgatisin qarkoren për obligimin e institucioneve për t'ju përgjigjur mandatit ligjor për përfundimin e klasifikimit të vendeve të punës. Qarkorja të përfundohet në javën e dytë të janarit 2016. MAP të zhvilloj të gjitha përgatitjet që klasifikimi i vendeve të punës të procedohet për miratim formal në Qeveri, jo më larg se në fund të muajit prill. MAP të raportojë rregullisht në mbledhje të sekretarëve dhe mbledhje të Qeverisë për ecurinë e procesit.
6. Obligohen MAP dhe MF të vlerësojnë koston e saktë të zbatimit të vendimit për klasifikimin e vendeve të punës, pasi të përmbillet procesi. Vlerësimi i kostos reale të reflektoj në KASH 2017-2019 dhe në rishikimin e buxhetit për vitin 2016. Ministria e Administratës Publike dhe Ministria e Financave duhet të kryejnë të gjitha përgatitjet që klasifikimi i vendeve të punës të filloj të zbatohet nga korriku i vitit 2016.
7. Ministria e Financave të sigurohet që strategjia për menaxhimin e financave publike të buxhetohet dhe të reflektojë në KASH 2017-2019.
8. Ministria e Administratës Publike dhe Zyra e Kryeministrit të angazhohen për ngritjen e kapaciteteve për Departamentin për Menaxhimin e Reformës së Administratës Publike, si dhe Zyrën për Planifikim Strategjik. Të shikohet mundësia për transferime të brendshme, duke identifikuar të punësuar nga skema e bursistëve të rinj, apo të shikohet mundësia e punësimit nga gjenerata e 10 e skemës së bursistëve të rinj, të cilët kthehen në vitin 2017. Ministria e Integrimit Evropian së bashku me MAP dhe ZKM, të ofrojnë para takimit të radhës të KMRAP, opsionet për ngritjen e kapaciteteve të këtyre dy zyrave.

.....
Sekretariati i KMRAP